


১১.৩ ক্রুসেড বা ধর্মযুদ্ধ

পবিত্রভূমি জেরুজালেমের উপর কর্তৃত্ব প্রতিষ্ঠাকে কেন্দ্র করে ইউরোপের খ্রিস্টান ও প্রাচ্যের মুসলমানদের মধ্যে একাদশ থেকে এয়োদশ শতক পর্যন্ত ২০০ বছরব্যাপী যে যুদ্ধ সংঘটিত হয়, তা ইতিহাসে ক্রুসেড নামে পরিচিত। মধ্যযুগে এশিয়া ও ইউরোপের ইতিহাসে এটি একটি যুগান্তকারী অধ্যায়। ইউরোপীয় খ্রিস্টানগণ তাদের ধর্মীয় নেতা পোপের নির্দেশে বুকে ক্রস চিহ্ন নিয়ে যুদ্ধে অংশগ্রহণ করেছিল এবং ক্রসকেই যুদ্ধের পতাকাতে ব্যবহার করেছিল বলেই ইতিহাসে এ যুদ্ধ ক্রুসেড নামে পরিচিত। প্রচ্যের মুসলমান ও ইউরোপীয় খ্রিস্টানদের মধ্যকার দীর্ঘকালের ঘৃণা, বিদ্বেষ ও দ্঵ন্দ্বের বহিঃপ্রকাশ ঘটেছিল এই ধর্মযুদ্ধে। তাই এর কারণ যেমন বহুবিধ ছিল তেমনি এর ফলাফলও ছিল সুদূরপ্রসারী।

ক্রুসেডের প্রেক্ষাপট : ক্রুসেডের প্রেক্ষাপট বিশ্লেষণ করতে গিয়ে ঐতিহাসিক পি. কে. হিটি বলেছেন যে, “চার্চের ক্রস, সৈনিকের তরবারি এবং বণিকদের অর্থভাণ্ডার মিলিত হয়ে ক্রুসেডের সূত্রপাত করেছিল।” ক্রুসেডের প্রেক্ষাপট আলোচনা করতে গেলে আরবজাতি ও সেলজুক তুর্কিদের উল্লেখ করতে হয়। সপ্তম শতক থেকে জেরুজালেমের উপর আরব মুসলমানদের আধিপত্য প্রতিষ্ঠিত হয়। প্রথম পর্বে খ্রিস্টানদের সাথে মুসলমানদের বিশেষ সংঘাতের বাতাবরণ তৈরি হয়নি। কিন্তু একাদশ শতকের মাঝামাঝি সময়পর্বে সেলজুক তুর্কিদের ক্ষমতায় অধিষ্ঠিত হওয়ার পরে পরিস্থিতি পালটে যায়। ধর্মীয় উদারতা না থাকার ফলে সেলজুক তুর্কিরা খ্রিস্টান তীর্থযাত্রীদের উপর অকথ্য অত্যাচার করত। খ্রিস্টান তীর্থযাত্রীরা তাদের উপর অত্যাচারের কথা ইউরোপে প্রচার করলে এক তীব্র চাঞ্চল্যের সৃষ্টি হয়। আর এই ঘটনাকে কেন্দ্র করেই ক্রুসেডের প্রেক্ষাপট রচিত হয়।

অন্য দিকে তৎকালীন পোপ দ্বিতীয় আরবান সপ্তম গ্রেগরির ন্যায় একচ্ছত্র ক্ষমতার অধিকারী হতে চেয়েছিলেন। একাদশ শতকে রোমান সন্নাটের সঙ্গে পোপের সম্পর্কের চরম অবনতি ঘটেছিল। পোপ এই অস্বস্তিকর অবস্থা থেকে বেরিয়ে এসে সন্নাটের উপর প্রভাব পুনঃপ্রতিষ্ঠিত করতে চেয়েছিলেন। অন্যদিকে জেরুজালেম অধিকৃত হলে



ক্রুসেডের জন্য পোপ দ্বিতীয়
আরবানের আহ্বান

বা
অ
রা
স
অ
মু
ই
চ
ে
ব
ৰ
ৰ
ৰ


সন্দাটের ক্ষমতার বিস্তৃতি ঘটবে ভেবে সন্দাটও ক্রুসেডারদের উৎসাহিত করেন। এভাবে বিভিন্ন স্বার্থের সংঘাতে ক্রুসেডের প্রেক্ষাপট রচিত হয়েছিল।

ক্রুসেডের ঘটনাপ্রবাহ : ১০৯৫ খ্রিস্টাব্দে পোপ আরবান দ্বারা ফ্রান্সের ক্লেরমণ্ট শহরে আতুত ধর্মসভায় মুসলমানদের হাত থেকে পবিত্র জেরজালেম নগরী উদ্ধার কল্পে ধর্মযুদ্ধে যোগদানের সিদ্ধান্ত গৃহীত হওয়ার পর থেকে পোপ ও তার অনুগামীদের ব্যাপক তৎপরতা লক্ষ করা যায়। এর পরবর্তীতে শুরু হয় এক রক্তশ্বরী ধর্মযুদ্ধের ইতিহাস, যা প্রায় ২০০ বছর ধরে চলেছিল। ঐতিহাসিকগণ ক্রুসেডের ঘটনাবলিকে তিনটি পর্যায়ে বিভক্ত করেছেন।

প্রথম পর্যায় : ১০৯৫ খ্রিস্টাব্দ থেকে ১১৪৪ খ্রিস্টাব্দ পর্যন্ত চলেছিল ক্রুসেডের প্রথম পর্যায়। এই পর্বে ইউরোপীয় খ্রিস্টানগণ ওয়াল্টার পিটার, গডফ্রে, বলডুইন, রেমন্ড ও স্টিফেন হেনরির নেতৃত্বে জেরজালেম উদ্ধারকল্পে অগ্রসর হন। পিটার থারমিটের নেতৃত্বে একদল বাহিনী সেলজুক তুর্কি সুলতান কিলিজ আরসালানকে পরাজিত করে তাঁর রাজধানী নাইসিয়া দখল করে। এর পরবর্তীতে রেমন্ডের নেতৃত্বে ক্রুসেডাররা অ্যান্টিওক দখল করে ১০৯৮ খ্রিস্টাব্দে। তুলুসের কাউন্ট রেমন্ডের নেতৃত্বে ৪০,০০০ সৈন্যের বিশাল বাহিনী ১০৯৯ খ্রিস্টাব্দে জেরজালেম দখল করে। গডফ্রেকে জেরজালেমের শাসক হিসাবে মনোনীত করা হয়। প্রথম পর্যায়ে ক্রুসেডারগণ মুসলমানদের হাত থেকে বহু অধিকার করেন, তার মধ্যে এডেসা, অ্যান্টিওক, জেরজালেম ও ত্রিপোলিতে খ্রিস্টান রাজ্য প্রতিষ্ঠিত হয়। ইতিমধ্যে জঙ্গি রাজবংশের ইমামউদ্দিন জঙ্গির নেতৃত্বে মুসলমানরা ক্রুসেডারদের উপর আক্রমণ হানে এবং এডেসা দখল করে। সিরিয়া থেকেও খ্রিস্টানদের বিতাড়িত করা হয়। ইমামউদ্দিন জঙ্গির আক্রমণে ক্রুসেডাররা পিছু হঠতে থাকে এবং এভাবেই ১১৪৪ খ্রিস্টাব্দে প্রথম পর্যায়ের ক্রুসেডের পরিসমাপ্তি ঘটে।

দ্বিতীয় পর্যায় (১১৪৬-১১৯৩ খ্রিস্টাব্দে) : ইমামউদ্দিন জঙ্গির পুত্র নূরউদ্দিন জঙ্গি পুনরায় খ্রিস্টানদের কাছ থেকে এডেসা অধিকার করে নিলে তা উদ্ধারের জন্য জার্মানির রাজা দ্বিতীয় কল্রাড ও ফ্রান্সের রাজা সপ্তম লুই-এর নেতৃত্বে ক্রুসেডাররা দ্বিতীয় পর্যায়ের ক্রুসেডে অংশগ্রহণ করে। এই সময় আইয়ুবি বংশের সালাউদ্দিন আইয়ুবি মুসলমানদের নেতৃত্ব প্রদান করেন। তিনি ১১৮৭ খ্রিস্টাব্দে হিটিনের যুদ্ধে ২০,০০০ ফরাসি সৈন্য নিয়ে গঠিত বাহিনীকে চূড়ান্তভাবে পরাজিত করেন। একে-একে এডেসা, অ্যান্টিওক ও ত্রিপোলি থেকে খ্রিস্টানদের বিতাড়িত করেন। অবশেষে জেরজালেমও তিনি দখল করেন। জেরজালেমের পতনের পর ইউরোপে তীব্র চাঞ্চল্যের সৃষ্টি হয়—যা তৃতীয় ক্রুসেডকে অনিবার্য করে তোলে।

তৃতীয় পর্যায় (১১৯৫-১২৯১ খ্রিস্টাব্দে) : তৃতীয় ক্রুসেডে ইউরোপীয় খ্রিস্টান বাহিনীর নেতৃত্বে ছিলেন জার্মানির রাজা ফ্রেডারিক বারবারোসা, ফ্রান্সের রাজা ফিলিপ অগাস্টাস এবং ইংল্যান্ডের রাজা রিচার্ড। বারবারোসা সাইলেশিয়ার একটি নদী অতিক্রম করতে গিয়ে মৃত্যু মুখে পতিত হন। অবশ্যেই ইংল্যান্ডের রিচার্ডের নেতৃত্বে ক্রুসেডারগণ জেরুজালেম অবরোধ করে। দীর্ঘদিন যুদ্ধ চলার পর কোনো পক্ষই সুবিধা করতে না পেরে অবশ্যে সন্ধি চুক্তিতে আবদ্ধ হয়।



ইউরোপীয় ক্রুসেড

১২০২ খ্রিস্টাব্দে চতুর্থ ক্রুসেডের সূচনা হয়েছিল। পোপ তৃতীয় ইনোসেন্টের নির্দেশে ইতালীয় বণিকরাই এই ক্রুসেডে মুখ্য ভূমিকা গ্রহণ করেছিল। তবে জেরুজালেম পুনরুদ্ধার করার তুলনায় বাইজান্টাইনের উপর আধিপত্য বিস্তারে তারা তৎপর ছিল কারণ তা হলেই তাদের বাণিজ্যিক আধিপত্য স্থাপিত হবে। যাই হোক চতুর্থ ক্রুসেডের উদ্দেশ্য পূরণ হয়নি এবং ব্যাপক হত্যাকাণ্ডের মধ্য দিয়েই শেষ হয়েছিল এই পর্বের ক্রুসেড।

১২১৭ খ্রিস্টাব্দে পোপ তৃতীয় ইনোসেন্টের আবেদনে পঞ্চম ক্রুসেড পরিচালিত হয়েছিল। এই ক্রুসেডের নেতৃত্ব দিয়েছিলেন হাসপিরির শাসক অ্যান্ড্রু।

১২২৮ খ্রিস্টাব্দে জার্মানির রাজা দ্বিতীয় ফ্রেডারিকের নেতৃত্বে ষষ্ঠ ক্রুসেড পরিচালিত হয়েছিল।

১২৪৮ খ্রিস্টাব্দে রাজা নবম লুই-এর নেতৃত্বে সপ্তম ক্রুসেড পরিচালিত হয়েছিল। ইতিমধ্যে ১২১২ খ্রিস্টাব্দে একটি মর্মস্পর্শী শিশুক্রুসেড অনুষ্ঠিত হয়েছিল। জেরুজালেমকে মুক্ত করার এই ক্রুসেডে বালকদেরকে ঢাল হিসাবে সামনে রাখা হয়েছিল। পরে ইতালীয় বণিকরা আরবদের কাছে এই শিশুদের বিক্রি করে দেয়। এভাবে ১২৯১ খ্রিস্টাব্দের মধ্যে মুসলমানগণ খ্রিস্টানদের নিকট থেকে অধিকাংশ অধিকৃত স্থান পুনর্দখল করলে ক্রুসেডের পরিসমাপ্তি ঘটে।

১১.৩.১ ক্রুসেডের কারণসমূহ

ধর্মীয়, অর্থনৈতিক, সামাজিক প্রভৃতি কারণেই ক্রুসেড সংঘটিত হয়েছিল। এই কারণগুলির মধ্যে অন্যতম হল—

১. ধর্মীয় কারণ

(ক) জেরুজালেম পবিত্র রাখার প্রশ্ন : হজরত ওমরের সময় থেকে ইসলামের সম্প্রসারণের কাজ চলছিল রাজ্য বিজয় ও ধর্ম প্রচারের মাধ্যমে। আমর ইবনে আল

আস কর্তৃক জেরুজালেম অধিকৃত হলে খ্রিস্টান জগতে ব্যাপক প্রতিক্রিয়া সৃষ্টি হয়। কারণ যিশু খ্রিস্টের জন্মভূমি জেরুজালেম খ্রিস্টানদের কাছে পবিত্র ভূমি হিসাবে গণ্য হত। অন্যদিকে জেরুজালেম হজরত মুহাম্মদ (সঃ)-এর মিরাজ



জেরুজালেম

গমনের স্থান। তাই এটি মুসলিমদের কাছেও পবিত্র ভূমি হিসাবে গণ্য হত। একইভাবে জেরুজালেম হজরত মুসা ও দাউদের (আ) স্মৃতি বিজড়িত স্থান হওয়ায় ইহুদিদের নিকটও এটি পবিত্র স্থান হিসাবে গণ্য হত। ১০০৯ খ্রিস্টাব্দে ফাতেমীয় খলিফা আল হাকিম খ্রিস্টানদের পবিত্র সমাধি ও গির্জা ধ্বংস করে দিলে খ্রিস্টানরা ধর্মীয় ভাবে আহত হয় এবং তারা এর প্রতিবিধানের চিন্তা করতে থাকে।

(খ) পোপের আধিপত্য বিস্তারের আকাঙ্ক্ষা : একাদশ শতাব্দীতে রোমান ক্যাথলিক গির্জা ও গ্রিক গির্জার মধ্যে প্রতিপত্তি প্রতিষ্ঠার প্রতিযোগিতা চলছিল। রোমান ক্যাথলিক গির্জার ধর্মগুরু পোপ গ্রিক খ্রিস্টানদের ধর্মীয় স্বীকৃতি দেননি। তিনি গ্রিক খ্রিস্টানদের নাস্তিক বলে মত প্রকাশ করেন। গ্রিক খ্রিস্টানদের উপর আধিপত্য প্রতিষ্ঠার গোপন ইচ্ছাকে বাস্তবায়িত করার লক্ষ্যে তিনি ইউরোপীয় খ্রিস্টানদের উত্তেজিত করার চেষ্টা করেন। খ্রিস্টানদের ঐক্যবদ্ধ করার উপায় হিসাবে মুসলমানদের বিরুদ্ধে তুসেড বা ধর্ম্যুদ্ধ শুরু করার পথ বেছে নেন।

(গ) তীর্থ্যাত্রায় বাধা প্রদান : খ্রিস্টানদের একটি পবিত্র কর্ম ছিল তীর্থ্যাত্রায় জেরুজালেমে আসা। প্রথম পর্বে মুসলমানরা ধর্মসহিষ্ণু ছিলেন বলে খ্রিস্টান তীর্থ্যাত্রীরা কোনোরূপ বাধার সম্মুখীন হয়নি। কিন্তু একাদশ শতক থেকে সেলজুক তুর্কিরা তীর্থ্যাত্রীদের বাধা প্রদান করে এবং কোনো কোনো ক্ষেত্রে নির্বাতনের ফলে ব্যবসা-বাণিজ্যের প্রসার আপন গতিতে গতিহীন হয়ে উঠেছিল।

২. অর্থনৈতিক কারণ

(ক) অর্থনৈতিক সংকট : দশম শতাব্দী থেকে ইউরোপের খ্রিস্টানদের সাথে মুসলমানদের অর্থনৈতিক দ্বন্দ্ব শুরু হয়েছিল। মুসলমানগণ ভূমধ্যসাগরীয় অঞ্চলে বাণিজ্যিক আধিপত্য প্রতিষ্ঠা করায় ইউরোপে অর্থনৈতিক সংকট দেখা দেয়। দশম শতাব্দী থেকে ইউরোপে দ্রুত জনসংখ্যা বৃদ্ধি পাওয়ায় কৃষির উপর ক্রমাগত চাপ পড়ে এবং বেকারের সংখ্যা ক্রমাগত বৃদ্ধি পেতে থাকে। অনিশ্চিত জীবিকার প্রশ্ন বিকুঠি করে তোলে এক বৃহৎ অংশকে।

(খ) সামাজিক অস্থিরতা : অর্থনৈতিক সংকট সামাজিক ক্ষেত্রে নিরাগণ অস্থিরতার জন্ম দেয়। এই অস্থিরতাকে বৃদ্ধি করে সামন্ততন্ত্রের একটি বিধান। এই বিধান যাতে পরিবারের কনিষ্ঠ পুত্র সম্পত্তি থেকে বঞ্চিত হওয়ায় লুঠতরাজ ছাড়া তাদের সামনে কোনো পথ খোলা ছিল না। এভাবে ইউরোপীয় সমাজ ক্রমে গৃহযুদ্ধের দিকে ধাবিত হয়। এই অবস্থায় সামাজিক সংহতি রক্ষার জন্য পোপ অভ্যন্তরীণ অস্থিরতাকে ধর্মযুদ্ধের খাতে প্রবাহিত করার জন্য সচেষ্ট হলেন।

(গ) বণিক স্বার্থ সংরক্ষণ : সেলজুক তুর্কিদের সভাব্য আক্রমণের হাত থেকে পূর্ব রোমান সপ্রাট ও পোপকে রক্ষার দায়িত্বার গ্রহণ করেছিল ইতালির বাণিজ্য সমৃদ্ধি নগরগুলি। বাণিজ্যিক স্বার্থের কারণেই এই বণিকরা এগিয়ে এসেছিল। কারণ, মুসলমানদের আধিপত্য ইতালির বণিকদের বাণিজ্যিক স্বার্থ ক্ষুণ্ণ করেছিল। পোপের যেমন দরকার ছিল নৌশক্তির, তেমনি বণিকদের স্বার্থ ছিল নিজেদের বাণিজ্যিক স্বার্থসিদ্ধি। যার ফলে পরিস্থিতি যুদ্ধের দিকে ধাবিত হয়েছিল।

৩. সামাজিক কারণ

সামন্ততন্ত্র তার চারিত্রিক কারণে ত্রুসেড বা ধর্মযুদ্ধকে উৎসাহিত করেছিল। সামন্তপ্রভুরা বরাবরই অন্যের উপর প্রভাব বিস্তার করতে চাওয়ায় রক্তক্ষয়ী সংগ্রাম লেগেই থাকত। এই প্রেক্ষাপটে সামন্তপ্রভুরা নিজেদের প্রভাব ও শক্তি বৃদ্ধির জন্য ত্রুসেডকে উৎসাহিত করে। তারা আশা করেছিল নতুন অঞ্চল অধিকৃত হলে তাদের এলাকা যেমন বৃদ্ধি পাবে, তেমনি ঐ অঞ্চলের লোককে ভূমিদাস হিসাবে জমিতে নিযুক্ত করা যাবে। ত্রুসেডে সামন্তপ্রভুদের সহযোগিতার বিনিময়ে তাদের ইচ্ছা পূরণের ব্যাপারে পোপ সম্মতি প্রদান করেন।

সামাজিক জীবনে ধর্মীয় উন্মাদনা : সামাজিক ভাবে পোপ সামন্তপ্রভুদের মতো সমাজের অন্যান্য শ্রেণিকেও ধর্মযুদ্ধে অংশ নেওয়ার জন্য প্রচলুক্ত করতে থাকেন। যেমন—ভূমিদাসদের বলা হয়, ধর্মযুদ্ধে অংশ নিলে তাদের আর সামন্তপ্রভুর নির্যাতন ভোগ করতে হবে না। ভবঘুরে ও সমাজ বিরোধীদের বলা হয় ধর্মযুদ্ধে অংশ নিলে তারা

নতুন দেশে সাধারণ নাগরিক হিসাবে সুখে বসবাস করতে পারবে। তাছাড়া ধর্মযুদ্ধে
শহিদ হলে স্বর্গ লাভের প্রত্যাশা দেওয়া হয় সাধারণ মানুষকে।

৪. সাংস্কৃতিক কারণ

ইসলাম ধর্মের আবির্ভাবের পূর্বে রোমান ও গ্রিকগণ ছিলেন সভ্যতার ধারক ও বাহক।
এজন্য তারা নিজেদেরকে গর্বিত বলে মনে করত। কিন্তু পরবর্তীতে ইসলামের আবির্ভাব
ও দ্রুত বিস্তারের ফলে প্রাচীন গ্রিক ও রোমান সভ্যতার প্রভাব বিনষ্ট হয়। যা খ্রিস্টানরা
সহজে মেনে নিতে পারেনি। নবম ও দশম শতকে গ্রিক ও রোমান সাম্রাজ্যে অধিকাংশ
স্থান মুসলমানরা অধিকার করে নেওয়ার ফলে ইসলাম বিরোধী এই মনোভাব আরও
প্রকট হয়ে ওঠে।

আধিপত্য বিস্তারের প্রতিদ্বন্দ্বিতা : ইসলামের আবির্ভাবের পর থেকেই খ্রিস্টান ও
মুসলমান উভয় সম্প্রদায়ই কর্তৃত্ব বিস্তারের জন্য পারস্পরিক দ্বন্দ্বে লিপ্ত হয়। তাদের এই
দীর্ঘ সংগ্রামের অন্যতম পরিণতি হল ক্রুসেড বা ধর্মযুদ্ধ। এশিয়া, ইউরোপ ও আফ্রিকার
বহু স্থানে মুসলিম আধিপত্য বিস্তারের ফলে খ্রিস্টানরা ক্রমশ কোণঠাসা হয়ে পড়ে।
তাদের হাত গৌরব পুনরুদ্ধারের জন্য তারা শেষবারের মতো ধর্মযুদ্ধে শামিল হয়েছিল।

প্রত্যক্ষ কারণ : ১০৭৬ খ্রিস্টাব্দে সেলজুক তুর্কিরা জেরুজালেম অধিকার করে
খ্রিস্টানদের পবিত্র গির্জার পাশে তৈরি করে একটি মসজিদ। এতে খ্রিস্টানরা আতঙ্কিত
হয়ে পড়ে। এরই প্রতিক্রিয়ায় পোপ দ্বিতীয় আরবান সমগ্র খ্রিস্টান জগৎকে এক ধর্মসভায়
আহ্বান জানান। পবিত্রভূমি জেরুজালেম মুসলমানদের হাত থেকে রক্ষা করার জন্য এই
সভা থেকে ধর্ম যুদ্ধের আহ্বান জানানো হয়। ১০৭৬ খ্রিস্টাব্দে ক্রুসেড বা ধর্মযুদ্ধ শুরু
হয়, যার পরিণামে প্রায় দুশো বছর ধরে মুসলমান ও খ্রিস্টানদের মধ্যে চলতে থাকে
এক রক্তক্ষয়ী সংগ্রাম।

১১.৩.২ ক্রুসেডের ফলাফল বা প্রভাব

পশ্চিমে জীবনযাত্রা ও সমাজের উপর ধর্মযুদ্ধগুলির প্রভাব এত দীর্ঘস্থায়ী ও ব্যাপক ছিল
যে, সেগুলিকে সভ্যতার ইতিহাসে নির্দেশক বলে গণ্য করা যায়। ঐতিহাসিক মেয়ার
বলেছেন যে—“পশ্চিম ইউরোপে জনগণের জীবন যাত্রার উপর ধর্মযুদ্ধগুলি পরোক্ষভাবে
এমন প্রভাব বিস্তার করেছিল যে, তারা সভ্যতার ইতিহাসে মহান নির্দেশক ছিল।”

(১) মঠের উপর প্রভাব : ক্রুসেডের ফলে মঠগুলির সম্পত্তির পরিমাণ অনেকাংশে
বৃদ্ধি পেয়েছিল কারণ ধর্মযুদ্ধে যোগদানকারীরা খুব কম দামে তাদের সম্পত্তি মঠগুলিকে
বিক্রি করে দিয়েছিল। লর্ডরা সন্ন্যাসীদের আশীর্বাদ পাওয়ার জন্য তাদের অনেক সম্পত্তি
দান করতেন। হাজার হাজার ধর্মযোদ্ধা যারা অসুস্থ অবস্থায় উৎসাহহীনভাবে ফিরে
এসেছিল তারা মঠের কাছে আশ্রয় চেয়েছিলেন। এবং নিজেদের সমস্ত জাগতিক বিষয়

সম্পত্তিকে মঠের উন্নতির জন্য দান করে ছিলেন। এইভাবেই মধ্যযুগীয় মঠগুলির সম্পত্তির পরিমাণ বৃদ্ধি পেয়েছিল।

(২) রাজনীতির উপর প্রভাব : (সামন্ততাত্ত্বিক অভিজাতদের দুর্বল করে দিয়ে শক্তিশালী রাজতন্ত্র গঠনের ক্ষেত্রে ধর্মযুদ্ধের প্রভাব লক্ষ করা যায়। বহু অভিজাত যারা ধর্মীয় অভিযানে অংশগ্রহণ করেছিল এবং ফিরে আসেননি তাঁদের সম্পত্তি উন্নরাধিকারীর অভাবে রাজার হস্তগত হয়েছিল) অনেকে আবার তাদের প্রতিশ্রুতি রাখতে গিয়ে তাদের ভাগ্যকে নষ্ট করেছিল। এই ভাবে অভিজাতরা সংখ্যায় অনেক কমে গিয়েছিল এবং সঙ্গে সঙ্গে কমে গিয়েছিল তাদের সামাজিক প্রভাব। অন্যদিকে রাজার ক্ষমতা ও পৃষ্ঠপোষকতা বৃদ্ধি পেয়েছিল।

(৩) সমাজের উপর প্রভাব : (পশ্চিমের জাতিগুলির সামাজিক জীবনের উপর ক্রুসেডের প্রভাব বেশ লক্ষণীয় এবং বেশ গুরুত্বপূর্ণ ছিল। তারা নিশ্চিত ভাবে শহর, দেশের সাধারণ মানুষের শক্তিকে ত্বরান্বিত করেছিল। ক্রুসেডের সুযোগে গ্রীতদাসরা তাদের দাসত্বের বন্ধনকে ভেঙে ফেলেছিল। শহরের শ্রীবৃদ্ধি ও শিল্পের উন্নতির ফলে অনেকে অতি সহজে ম্যানর থেকে পালাতে সক্ষম হয়েছিল।) ঐতিহাসিকদের বক্তব্য অনুযায়ী ক্রুসেড চলাকালীন মহিলাদের সামাজিক অবস্থানের লক্ষণীয় পরিবর্তন দেখা দিয়েছিল। কারণ, স্বামীদের অনুপস্থিতিতে পারিবারিক তত্ত্বাবধানের ভার বর্তেছিল মহিলাদের উপর। গ্রিক এবং ধর্মযুদ্ধে যোগদানকারী মুসলমানদের মধ্যে স্বাধীন মেলামেশার ফলে পশ্চিমের জীবন যাত্রার মূল বৈশিষ্ট্যের পরিবর্তন লক্ষ করা গিয়েছিল।

(৪) অর্থনীতির উপর প্রভাব : (ধর্মযুদ্ধে যোগদানকারী যোদ্ধা এবং রাজপুত্রদের জীবনের বিনিময়ে মধ্যযুগীয় শহরগুলি বহু রাজনৈতিক সুযোগ সুবিধা লাভ করেছিল। দ্বাদশ ও ত্রয়োদশ শতকে মানুষের হাতে নগদ অর্থের পক্ষা থাকায় তারা সামন্তপ্রভুদের একচেটিয়া কেন্দ্রীভূত পুঁজির বদলে স্বতন্ত্রভাবে বিকশিত হওয়ার সুযোগ লাভ করে। এ ভাবে অভিজাতদের হাত থেকে ক্ষমতা ধনসম্পদ ক্রমশ হাতছাড়া হওয়ায় শহর ও নগরগুলির রাজনৈতিক গুরুত্ব ক্রমশ বেড়েই চলেছিল।) ধর্মযুদ্ধগুলি ব্যবসা-বাণিজ্য উৎসাহ দানের মাধ্যমে শহর ও নগরগুলির উন্নতিতে ত্বরান্বিত করেছিল। ধর্মযুদ্ধ চলেছিল ধর্মযোদ্ধাদের চাহিদা পূরণের জন্য যার ফলশ্রুতিতে ব্যবসা কেন্দ্র হিসাবে ভেনিস, জেনোয়া এবং পিসা বিপুল সম্পদ ও খ্যাতি অর্জন করেছিল।

(৫) ভৌগোলিক পরিবেশের উপর প্রভাব : (ধর্মযুদ্ধগুলি বিখ্যাত ভ্রমণকারীদের এশিয়ার নির্জন দেশগুলিতে পাড়ি দিতে উৎসাহিত করেছিল। কলম্বাস ও ভাস্কো-ডা-গামার সফল সমুদ্র যাত্রা ছিল ক্রুসেডের পরোক্ষ ফলাফল। জনগণকে ভ্রমণের প্রতি উৎসাহিত করে ক্রুসেডগুলি সংকীর্ণ আঞ্চলিকতাবাদের দেওয়াল ভেঙে দিয়েছিল এবং আন্তর্জাতিক

নির্ভরশীলতার ক্ষেত্রও উৎসাহিত করেছিল। ঐতিহাসিক হেনরি পিরেন বলেছেন যে, ক্রুসেডের ফলে পশ্চিম ইউরোপীয়দের জন্য ভূমধ্যসাগরও উন্মুক্ত হয়েছিল।

(৬) বোধ শক্তির উপর প্রভাব : ক্রুসেড অংশগ্রহণকারী ধর্মযোদ্ধাদের মন থেকে সংকীর্ণতা চিরতরে দূরীভূত হয়েছিল। ক্রুসেডের আগে ইউরোপের খ্রিস্টানরা মুসলমানদেরকে ভীষণভাবে ঘৃণা করত। কিন্তু ক্রুসেডের শেষ পর্যায়ে এই ঘৃণার পরিমাণ অনেকটাই বিলুপ্ত হয়েছিল। কুসংস্কার ও প্রচলিত প্রথাগুলি এই সকল মানুষকে পরস্পরের কাছে আসতে বাধা দিতে পারেনি। ক্রুসেড ও সামুদ্রিক অভিযানগুলি ইউরোপীয়দের মিথ্যা ধারণাগুলিকে অনেকখানি সমাধান করেছিল। উদারনীতিবাদ পশ্চিমের সংকীর্ণ আঞ্চলিক অসহনশীল ধ্যানধারণার স্থান দখল করেছিল।

(৭) সাহিত্যের উপর প্রভাব : (পশ্চিমি সাহিত্যের উপর ক্রুসেডের প্রভাব বেশি মাত্রায় পরিলক্ষিত হয়েছিল। সাহিত্য রচনার বিভিন্ন উপাদান যেমন বিভিন্ন প্রচলিত প্রথা ধ্যান, ধারণা, বীরের কার্যকলাপ যেগুলি প্রাচ্যদেশ থেকে নিয়ে আসা হয়েছিল, যা সমৃদ্ধ করেছিল পশ্চিমি সাহিত্য-সাধনার চর্চাকে) শেঙ্কপিয়ার ঘোড়শ শতকে ভ্রমণকারীদের দ্বারা বিশেষভাবে প্রভাবিত হন, যারা প্রাচ্য দেশ থেকে বিভিন্ন প্রকারের সাহিত্য রচনার উপাদান নিয়ে এসেছিলেন।

(৮) বিজ্ঞানে ও স্থাপত্য শিল্পের উপরে প্রভাব : (ক্রুসেডগুলি সামরিক বিজ্ঞানের উপর যথেষ্ট প্রভাব বিস্তার লাভ করেছিল। বিশাল আকৃতির দুর্গ ও প্রাসাদের ধরন, অবরোধ করার পদ্ধতি প্রভৃতি ধর্মযোদ্ধারা পূর্ব দিকের দেশ থেকে পশ্চিমে নিয়ে এসেছিলেন। স্থাপত্য শিল্পের উপরও ধর্মযুদ্ধে প্রভাব পরিলক্ষিত হয়) পরিত্র সমাধিগুলির নির্মাণ কৌশলকে পশ্চিমি জনগণ অনুকরণ করতে শুরু করেছিল। জেরুজালেমের পরিত্র সমাধির অনুকরণে লন্ডনের The Great Temple Church নির্মাণ করা হয়েছিল।

(৯) ধর্মস ও রক্তক্ষয় : ক্রুসেড ছিল ধর্মস ও অবলুপ্তির মূর্ত প্রতীক। ক্রুসেডের ফলে পশ্চিম এশিয়ার বহু এলাকা ও নগর ধর্মসপ্রাপ্ত হয়। এবং শস্য শ্যামলা উৎপাদন ক্ষেত্র মরুভূমিতে পরিণত হয়। বহু বিক্ষালী পরিবার সর্বস্ব হারিয়ে একেবারে নিঃস্ব হয়ে যায়। অন্যদিকে খ্রিস্টানরা বিপুল ধনসম্পদ ও লক্ষ প্রাণের বিনিময়েও মুসলমানদের কাছ থেকে পরিত্র ভূমি জেরুজালেম উদ্ধার করতে পারেনি। তাই বলা যায়, ধর্মস আর রক্তক্ষয় ছিল ক্রুসেডের বিষময় ফল।

(১০) ধর্ম্যাজকদের ক্ষমতা হ্রাস : (ধর্ম্যাজকদের উগ্র প্ররোচনার ফলে বিভিন্ন শ্রেণির মানুষ ক্রুসেডে যোগদান করেছিল। এই ক্রুসেড উপলক্ষ্যে রাজা, সামন্তপ্রভু ও যাজকরা সাধারণ জনগণের কাছ থেকে জোর করে অর্থ আদায় করতে থাকে। ফলে সাধারণ জনগণ এই ধর্ম্যুদ্ধকে মানবতা বিরোধী বলে বিবেচনা করে। ক্রুসেডে ভয়াবহ ধর্মস ও রক্তক্ষয়ের ফলে ইউরোপে চার্চ ও পোপ বিরোধী মনোভাব গড়ে ওঠে)

এভাবে মানুষের মনে পোপের উজ্জ্বল অবস্থান স্নান হয়ে যায়। এর পাশাপাশি ধর্ম যাজকদের ক্ষমতা ও প্রতিপত্তি বহুলাংশে হ্রাস পায়।

(১১) প্রাচ্য ও পাশ্চাত্যের মধ্যে সম্পর্ক স্থাপন : ক্রুসেডের একটি গুরুত্বপূর্ণ ফল ছিল প্রাচ্য ও পাশ্চাত্যের মধ্যে সম্পর্ক স্থাপন ও ভাবের আদানপ্রদান। দীর্ঘ দুইশত বছর ধরে মুসলমান ও খ্রিস্টানদের মধ্যে এই ভাবের আদান প্রদানের ফলে প্রাচ্য ও পাশ্চাত্যের মধ্যে গভীর সম্পর্ক স্থাপিত হয়। এর ফলশ্রুতিতে ইউরোপের নাগরিকদের মধ্যে ভৌগোলিক জ্ঞানের পরিধি ও প্রাচ্যের সমরবিদ্যা সম্পর্কিত জ্ঞানের পরিধি বৃদ্ধি পায়। ক্রুসেডের পরবর্তীতে প্রাচ্যের বিভিন্ন ফল ইউরোপের বিভিন্ন অংশে উৎপাদিত হতে শুরু করে।

(১২) শিল্প ও ব্যবসা বাণিজ্যের প্রসার : ধর্মযুদ্ধের ফলে ইউরোপে ব্যবসা-বাণিজ্য ও শিল্পের প্রভৃতি উন্নতি সাধিত হয়েছিল। কারণ এই যুদ্ধের ফলে ভূমধ্যসাগরে ইউরোপীয়দের আধিপত্য প্রতিষ্ঠিত হয়। ক্রুসেড চলাকালীন প্রাচ্য ও পাশ্চাত্যের মধ্যে বাণিজ্যিক সম্পর্কের যে অবনতি ঘটেছিল তা পরবর্তীতে গতিশীল হয়ে ওঠে। এই প্রাচ্য দেশের বাণিজ্যের ফলশ্রুতিতে ইউরোপে বিভিন্ন ধরনের শিল্পের বিকাশ ঘটে। প্রাচ্য দেশের কাঁচামাল ও খনিজদ্রব্যের সাহায্যে ইউরোপে শিল্পের চরম উৎকর্ষ সাধিত হয়।

এইভাবে শুধুমাত্র ধর্মীয় ক্ষেত্রে উৎসাহ দানের জন্য ক্রুসেডগুলি ইতিহাসে এত গুরুত্বপূর্ণ নয়। এগুলি একটি নতুন দিগন্তের উন্মোচন করেছিল। ধর্মযুদ্ধগুলি নতুন যুগের আগমন বার্তা ঘোষণা করেছিল। ঐতিহাসিক মেয়ারের ভাষায় বলা যায়—“পশ্চিম ইউরোপে জীবন ধারণের ক্ষেত্রে ক্রুসেড সভ্যতার ইতিহাসে এক অসাধারণ দিক চিহ্ন হিসাবে প্রতিভাত হয়েছিল।”

